

Kirsty Williams AC
Y Gweinidog Addysg
Minister for Education



Llywodraeth Cymru
Welsh Government

Ein cyf/Our ref: MA/KW/5702/19

Lynne Neagle AC
Y Cadeirydd
Y Pwyllgor Plant, Pobl Ifanc ac Addysg
Cynulliad Cenedlaethol Cymru
Tŷ Hywel
Bae Caerdydd
CF99 1NA

SeneddCYPE@cynulliad.cymru

12 Rhagfyr 2019

Annwyl Lynne,

Wrth i'ch Pwyllgor graffu ar y Bil Anghenion Dysgu Ychwanegol a'r Tribiwnlys Addysg (Cymru), gwnaed ymrwymiad i ddarparu diweddariadau rheolaidd ar y rhaglen i drawsnewid y system Anghenion Dysgu Ychwanegol (ADY). Dyma'r wythfed llythyr i roi'r wybodaeth ddiweddaraf ichi.

1. Deddfwriaeth a chanllawiau statudol

Ar 17 Medi, cyhoeddais newidiadau i'r amserlen a bennwyd ar gyfer gweithredu Deddf Anghenion Dysgu Ychwanegol a'r Tribiwnlys Addysg (Cymru) 2018 ('y Ddeddf'). Bydd y Cod ADY a'r rheoliadau nawr yn cael eu gosod i'r Cynulliad eu cymeradwyo yn 2020, a bydd y system ADY newydd yn dechrau cael ei gweithredu'n raddol o fis Medi 2021, a'r rolau statudol a grewyd o dan y Ddeddf yn cychwyn ym mis Ionawr 2021.

Rwy'n hynod ddiolchgar i'r rheini a ymatebodd i'r ymgynghoriad. Bydd yr adborth a ddaeth i law gan randdeiliaid, dysgwyr a theuluoedd yn llywio penderfyniadau polisi ar bynciau anodd o bob math. O ystyried graddfa a chymhlethdod y gwaith sy'n ofynnol er mwyn diwygio'r Cod a'r rheoliadau drafft yng ngoleuni'r adborth, byddwn nawr yn gosod y Cod a'r rheoliadau i'r Cynulliad eu cymeradwyo yn 2020. Byddwn hefyd yn ystyried sut gellir gwella'r Cod i'w wneud mor glir â phosibl, er mwyn sicrhau bod y rheini sydd â swyddogaethau o dan y Ddeddf yn deall yn llawn eu rhwymedigaethau statudol a sut i weithredu'r system newydd.

Bae Caerdydd • Cardiff Bay
Caerdydd • Cardiff
CF99 1NA

Canolfan Cyswllt Cyntaf / First Point of Contact Centre:
0300 0604400

Gohebiaeth.Kirsty.Williams@llyw.cymru
Correspondence.Kirsty.Williams@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Yn ogystal, bydd cyflwyno'r system newydd o fis Medi 2021 yn gofalu bod digon o amser i wasanaethau ymbaratoi cyn i'r system newydd ddod i rym, a fydd gobeithio yn arwain at weithredu llyfnach, mwy llwyddiannus. Bydd cychwyn y rolau statudol ym mis Ionawr 2021 hefyd yn caniatáu amser ychwanegol i'r bobl a benodir i'r rolau baratoi eu hunain a'u sefydliadau i ysgwyddo'u dyletswyddau o 1 Medi 2021.

2. Gweithredu / cymorth trosglwyddo

Yn gynharach eleni, cyflwynodd Arweinwyr Trawsnewid ADY gynlluniau cyfathrebu a chynlluniau gweithredu rhanbarthol ac ym maes addysg bellach ar gyfer 2019-20. Roedd y cynlluniau yn amlinellu sut mae pob ardal yn ymbaratoi ar gyfer gweithredu'r system newydd. Cyfarfu fy swyddogion â'r Arweinwyr Trawsnewid yn unigol dros yr haf i drafod eu cynlluniau yn fanwl.

Rydym yn parhau i gwrdd â'r grŵp Arweinwyr Trawsnewid ADY unwaith bob dau fis. Cyn y cyfarfodydd, mae'r Arweinwyr Trawsnewid yn paratoi adroddiadau sy'n nodi manylion y cynnydd a wnaed o ran amcanion y cynlluniau gweithredu. Rydym yn fodlon bod cynnydd da i'w weld ar draws pob ardal o ran cyflawni'r amcanion.

Yn unol â'r penderfyniad i ymestyn yr amserlen ar gyfer gweithredu'r Ddeddf, mae penderfyniad wedi'i wneud erbyn hyn i ymestyn yr amserlen ar gyfer swyddi Arweinwyr Trawsnewid ADY hefyd un flwyddyn tan fis Mawrth 2022.

3. Datblygu'r gweithlu

Gan weithio gyda'n Harweinwyr Trawsnewid ADY, rydym yn rhoi pecyn cynhwysfawr ar waith i hyfforddi, meithrin sgiliau craidd a chynnig datblygiad proffesiynol parhaus i bob ymarferydd. Mae rhan o'r gwaith hwn yn golygu datblygu cynnig dysgu proffesiynol penodol ar gyfer Cydlynwyr Anghenion Dysgu Ychwanegol er mwyn rhoi cyfle iddynt ddatblygu neu wella sgiliau y bydd eu hangen arnynt i gyflawni'r rôl yn effeithiol. Bydd rheolwr prosiect, a ddechreuodd weithio ar y rhaglen ym mis Tachwedd, yn rheoli'r gwaith o ddatblygu a gweithredu'r cynnig dysgu hwn.

Bydd myfyrwyr rhaglenni Addysg Gychwynnol Athrawon yn chwarae rôl hollbwysig yn y broses o gyflwyno'r system ADY newydd a Maes Dysgu a Phrofiad Iechyd a Lles. Mae'r meini prawf achredu ar gyfer rhaglenni Addysg Gychwynnol Athrawon yng Nghymru yn nodi ei bod yn ofynnol i ddarparwyr partneriaethau ddatblygu gwybodaeth a dealltwriaeth athrawon dan hyfforddiant o iechyd a lles disgyblion ac ADY. Er nad ydym yn nodi'r union adnoddau y dylid eu defnyddio, rydym yn gweithio gyda phrifysgolion i gefnogi eu hymdrechion i sicrhau bod adnoddau dysgu ADY a iechyd a lles ar gael er mwyn cyfoethogi prif raglenni astudio Addysg Gychwynnol Athrawon a thu hwnt. Er enghraifft, rydym yn goruchwyllo prosiect i ddatblygu adnoddau mewn nifer o feysydd, gan gynnwys: niwroddatblygiad ac addysgeg, datblygiad plentyn, lles emosiynol a meddyliol, ADY a phrofiadau niweidiol yn ystod plentyndod. Y bwriad yw sicrhau bod yr adnoddau hyn yn barod i'w defnyddio o fis Medi 2020.

4. Codi ymwybyddiaeth


Ers cyhoeddiad 17 Medi y cyfeiriwyd ato yn rhan 1 y llythyr hwn, mae Llywodraeth Cymru wedi bod yn diweddarau ei deunydd ar-lein i adlewyrchu'r newidiadau yn yr amserlen weithredu. Mae cwestiynau cyffredin diwygiedig wedi'u cyhoeddi ar wefan y Llywodraeth, ac mae cyhoeddiadau newydd yn cael eu datblygu, yn benodol ar gyfer gwahanol randdeiliaid. Mae gwaith yn mynd yn ei flaen gydag Eliesha Cymru sy'n helpu Llywodraeth Cymru i ddatblygu deunyddiau hyfforddi ar gyfer y rheini a fydd yn

gweithredu'r system ADY ac i godi ymwybyddiaeth. Cytunwyd ar ddull o sicrhau bod yr hyfforddiant yn hwylus i bob rhanddeiliad a phartner gweithredu, a'i fod yn gyson.

Yn ogystal, byddwn yn ymgynghori yn fuan ar elfennau o'r Cod a'r rheoliadau nad oedd yn bosibl inni ymgynghori arnynt o'r blaen. Mae'r rhain yn ymwneud â rhieni plant a phobl ifanc sy'n ddiffygiol eu galluedd a rhestr y Sefydliadau Ôl-16 Arbennig Annibynnol. Maent yn elfennau hanfodol o'r rheoliadau a'r Cod cyffredinol, a byddwn yn targedu ein cyfathrebu er mwyn i randdeiliaid allu ymateb yn briodol.

Rydym yn rhagweld y bydd rheoliadau'r Sefydliadau Ôl-16 Arbennig Annibynnol yn effeithio ar grŵp penodol o randdeiliaid, ac rydym yn gobeithio lansio'r ymgynghoriad hwn ddechrau'r flwyddyn newydd. Rydym yn disgwyl cynulleidfa lawer ehangach i'r rheoliadau sy'n ymwneud â rhieni plant a phobl ifanc sy'n ddiffygiol eu galluedd a'r bennod gyfatebol yn y Cod, ac felly er mwyn sicrhau'r un mynediad i bawb i'r wybodaeth, rydym hefyd yn paratoi fersiynau hawdd eu deall o'r ymgynghoriad hwn ac sy'n hwylus i bobl ifanc. Rydym yn gobeithio lansio hyn ym mis Chwefror 2020.

Yn gywir

A handwritten signature in black ink, appearing to read 'Kirsty Williams'.

Kirsty Williams AC
Y Gweinidog Addysg